

**Uunga siunnersuut: Suliffeqarnermi innersuussisarneq il.il pillugit Inatsisartut
inatsisaata nr. 5, 8. juni 2014-imeersup allannguuteqartinnissaa pillugu Inatsisartut
inatsisaat nr. xx, yy 2015-imeersoq
(Suliffinnut nittartakkap atorneqarnera)**

pillugu

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortat Siverth K. Heilmann	(Atassut)	siulittaasoq
Inatsisartunut ilaasortaq Justus Hansen	(Demokraatit)	siulittaasup tullia
Inatsisartunut ilaasortaq Aqqaluaq B. Egede	(Inuit Ataqtigiit)	
Inatsisartunut ilaasortaq Nikolaj Jeremiassen	(Siumut)	
Inatsisartunut ilaasortaq Peter Olsen	(Inuit Ataqtigiit)	

UPA2015-imi ulloq 18. marts 2015-imi siullermeerinerup kingorna ataatsimiititaliap siunnersuut misissorpaa aammalu isumaliutigisani Inatsisartunut matumuuna ingerlateqqillugit.

1. Siunnersuutip imarisaa siunertaalu

Suliffinnut nittartakkap 2015-imi upernaakkut saqqummiunnissaa Naalackersuisut kissaatigimmassuk siunnersuut saqqummiunneqarpoq. Suliffinnut nittartagaq nunatsinni suliffeqarnermut tamarmiusumut ikorfartuutaassaaq aammalu suliffiit inuttassarsiukkat suliffissarsiortullu atorluarneqarsinnaasumik takussutissiorneqarnissaannik qulakkeerissalluni. Suliffinnut nittartakkap siunertaa aamma tassaavoq suliffissaaleqisut ikilisinnissaat aammalu sulisartunik ilinniagaqarsimanngitsunik nunanit allaneersunik nunatsinniittunik ikilisaanissaq.

Suliffinnut nittartagaq suliffissarsiuussisarfinnut aamma suliffissarsiortunut Kalaallit Nunaanni atorfinnik inuttaligassanik suussusersinissamut sakuussaaq aammalu sulisitsisunit atorfinnik inuttassarsiornermi saqqummiisarfissatut imaluunniit sulisartunik suliffissaaleqisunik piginnaasalinnik ujartuinissamut atorneqarsinnaavoq.

Siunnersuutip siunertaa tassaavoq suliffinnut nittartakkap atorneranut malittarisassiat atuuttussat aalajangersaaviginissaat.

2. Siunnersuutip Inatsisartuni siullermeerneqarnera

Inatsisissatut siunnersuutip siullermeerneqarnerani inatsisissatut siunnersuutip siunertarisai annertuumik taparserneqarput.

3. Tusarniaanermut akissutit

Siunnersuut piffissami 10. juni 2014-imit 15. august 2014-imut makkununga tusarniaassutigineqarpoq:

Namminersorlutik Oqartussani naalackersuisoqarfiit, Kalaallit Nunaanni Sulisitsisut Peqatigiiffiat, NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, IMAK aamma PIP. Aammattaaq siunnersuut Namminersorlutik Oqartussat tusarniaanermi nittartagaatigut tamanut tusarniaassutigineqarsimavoq.

Tusarniaanermi akissutit makkununga pissarsiarineqarput:

Kalaallit Nunaanni Sulisitsisut Peqatigiiffiat, PIP, Kommuneqarfik Sermersooq, Kommune Kujalleq, IMAK aamma KANUKOKA.

3.1 Ataatsimiititaliap tusarniaanermut oqaaseqaataa.

Ataatsimiititaliap tusarniaanermut oqaaseqaatissaqanngilaq. Tusarniaanermut akissutit tiguneqartut ataatsimiititaliamit takuneqarput aammalu Naalackersuisut tusarniaanermut akissutinut ataasiakkaanut nassuiaatini nassuiaatigisaat tamakkiisuusut isumaqarluni.

4. Ataatsimiititaliap siunnersuummik suliarinninnera

Partiit akornanni siunnersuut annertuumik tapersorneqartoq ataatsimiititaliamit maluginiarneqarpoq. Suliffinnut nittartagaq nunatsinni suliffissaaleqisut atorfiillu inuttassarsiukkat eqqarsaatigalugit suliffeqarnermi nuna tamakkerlugu pitsaaneruummik ataqatigiittoqalerneranut peqataaqataajumaartoq ataatsimiititaliamit neriuutigineqarpoq.

Ataatsimiititaliap Naalackersuisut assigalugit isumaqarpoq suliffinnut nittartagaq sulisussanik nunanit allaneersunik atuinerup killilersimaarneqarnissaanut peqataaqataasinnaasoq, tassami atorfiit inuttaqanngitsut sulisussanut nunaqavissunut nuna tamakkerlugu allagarsiuunneqarsinnaanerannut suliffinnut nittartagaq peqataaqataasinnaamat. Tamatuma peqatigisaanik sulisussanik nunanit allaneersunik atorfinitsitsinissamik qinnuteqarnissamut periarfissinneqannginnerminni sulisitsisut nunatsinni sulisussanik naleqquttunik

sukumiisumik ujarlersimanissaat suliffinnut nittartakkap nassatarissavaa.

5. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput. Taamaalillunilu Naalackersuisut apequt tamanna sukumiisumik misissorsimassagaat aammalu inatsisissat siunnersuutip tamatuma piviusunngortinneqarnerata aningaasaqarnikkut malitsigisanik kinguneqannginnissaa ataatsimiititaliamit tutsuigineqarpoq.

6. Ataatsimiititaliap inassuteqaatai

Siunnersuut Inatsisartunit akuerineqassasoq ataatsimiititaliami amerlanerussuteqartut Siumumeersut, Atassummeersut Demokraatineersullu inassutigaa.

Ataatsimiititaliami ikinnerussuteqartut Inuit Ataqtigii-neersut ima tunngavilersuuteqarlutik siunnersuut itigartinneqassasoq inassutigaa:

Suliffinnut nittartagaq kommunit killeqarfii akimorlugit sulisussarsiortarnermut oqilisaataassaaq aammalu taanna aqutugalugu atorfiit inuttaqanngitsut sapinngisamik annertunerpaamik sulisussanit nunatsinneersunit inuttalerneqartassallutik. Tamanna pissaaq suliffissarsiortut tamarmik suliffinnut nittartakkamut CV-nik, ilinniakkatigut tunuliaqutaasunik, inuussutissarsiortarnermut misilittakkanik suliffigerusutanillu nassuiaatitalinnik inissiinerisigut.

Siunnersuutillit siullermeerneqarnerani arlalinnik apeqquteqartoqarpoq akissuteqarfigineqanngitsunik.

Inatsisissat siunnersuummut nassuiaatini suliffissaaleqisut “tulluartussarsiuussassani 2-imi aamma 3-mi” inissisimasut suliffinnut nittartakkamut “suliffissarsiortuunngitsutut” nalunaarsorneqassapput. Tamatumani pissutaavoq inuit tulluartussarsiuussassani 2 aamma 3-mi inissisimasut suliffeqalersinnaassagunik tunngaviusumik piginnaasamikkut qaffassaavigineqarnissaat, qulaajaavigineqarnissaat katsorsarneqarnissaalluunniit pisariaqartimassuk.

Suliffissaaleqisunik tulluartussarsiuusseriaaseq eqqortumik takutitsinngitsoq arlaleriarluni saqqummiunneqarsimavoq. 2014-2017-imi Suliffeqartitsinermit Periusissiami assersuutugalugu ima allassimasoqarpoq ”innuttaasut naleqqussakkat 1-imiittut amerlavallaarujussuartutut isikkoqarpasipput”.

Suliniut tamanna siunertarisaq malillugu ilumut sunniteqassanersoq Inuit Ataqatigiinnit isumakuluutigineqarpoq. Isumaqarpugut suliniut atorluarneqarsinnaanngippat aningaasat suliniummut tassunga immikkoortinneqartut amerlasuupilussuusut. Taamaassappammi suliassaq taanna allaffissornikkut suliassaalerluni kommuninut suliffissaaleqisunullu pisussaaffinngortinneqaannassaaq. Suliffinnut nittartakkap suliffissaaleqisut amerlanerusut suliffeqalernerannik kinguneqarnissaa Inuit Ataqatigiinnut pingaaruteqarpoq.

Taamaattumillu makku akissuteqarfigineqarnissaat kissaatigaarput:

Suliffissaaleqisunik tulluurtussarsiuusseriaatsimut immikkoortiterineq suliffittaarnissamut akimmisaarutaalinnginnissaa qanoq qulakkeersinnaavarput? Taama pisoqarsinnaavoq suliffissaaleqisunik tulluurtussarsiuussassani 2-mi kukkusumik inissinneqarsimagaanni imaluunniit atorfirmut inuttassarsiukkamut naleqquttunik piginnaasaqaraluarluni ” suliffissarsiortuunngitsut” nalunaarsorneqarsimagaanni. Inunnik suliffissaaleqisunik tulluurtussarsiuunneqartunut taama immikkoortiterineq inuit ataasiakkaat ineriartornerannut aporfiulissanngilaq.

Periuseriarineqartup kukkuneqarnera taassumalu ilaatigut piffiit ilaanni eqqortumik atorneqannginnera maannangaq nassuerutigineqareermat Inuit Ataqatigiinnit isumakuluutigineqarpoq. Suliffissaaleqisunik tulluurtussarsiuusseriaatsip inissilluarneqarnissaata tungaanut suliffinnut nittartagaq kinguartinneqartariaqarpoq. Internetikkut iserniarnermik ajornartorsiuteqartoqarnera kommuninilu annertuumik ulapittoqarnera ulluinnarni tusartuarlugu kommunit suliffissaaleqisullu CV-mik suliaqarlutillu taassuminnga suliffinnut nittartakkamut inissinissaat qanoq qulakkeerneqassava? Suliassamik nutaamik tamatuminnaga isumaginninnissamut kommunit piareersimanissaat Inuit Ataqatigiinnit assorsuaq pingaartinneqarpoq.

Apeqqutinut taakkununnga naammaginartumik akissuteqartoqartinnagu siunnersuut tapersersinnaanngilarput. Aammattaaq oqaatigisariaqarparput suliffinnut nittartakkamut nutaamut nuttarnelulermik pilersitsisussamut aningaasarpaalunnik maanna immikkoortitsisoqaraluartoq aningaasanut inatsimmi nuttarnelulersitsiniarluni aningaasaliissutinut piginnaangorsaaqqinnermullu aningaasanik amerlanerusunik immikkoortitsisoqanngilaq. Tamanna ataqatigiittoqannginneranik ersarilluinnartumik takutitsisoq isumaqarpugut.

Taama oqaaseqarluni isumaliutissiisumilu oqaatigineqartutut paasinnilluni ataatsimiititaliap siunnersuut aappasaaniigassanngortippaa.

Siverth K. Heilmann
Siulittaasoq

Justus Hansen
Siulittaasup tullia

Nikolaj Jeremiassen

Peter Olsen

Aqqaluaq B. Egede